

摘藻堂四庫全書薈要

史部

欽定四庫全書薈要卷八千三百六十九

欽定大清通禮卷三十九

軍禮

周官九伐之法蒐狩之政掌之司馬而宗伯之職
大師大田必備其禮

國家承平百有餘年內整六師外攘四夷武功戎備
超軼千古爰輯治兵振旅師征受成諸容節著爲
軍禮若夫古者救日以太僕贊鼓實夏官之屬

故杜佑通典綴之軍禮今仍其義附於篇

皇帝大閱之禮間三歲兵部奏請舉行得

旨疏上王公大臣名

欽命六人總理大閱軍事徧飭八旗火器前鋒護軍驍
騎諸營各修整戎器甲冑金鼓旗纛之屬移欽天
監諏閱武吉日以

聞乃下所司戒備如式

右簡師戒辦諏吉

前期二月八旗佐領各出弁卒爲大閱之衆

命八旗都統副都統前鋒統領護軍統領各勒所部練
兵於演武場教士衆習旌旗指麾金鼓螺角作止
之節知行陣險夷坐起進退之法持五兵之便戰
鬪之備嚴明紀律罔敢不欽前一月有司豫擇

大閱之所除地爲場總理閱兵王公大臣會集統軍將
帥率弁卒擐甲合操於內申令如前儀

右訓練

前二日有司豫於

行宮供張武備院卿率官校赴

大閱處列

御營張

幄殿設

御座於正中張圓幄於

殿後設

御用甲冑弓矢於幄內橐鞬具八旗將校甲兵並赴

大閱處依式布步騎軍營左翼鑲黃正白鑲白正藍四旗在東右翼正黃正紅鑲紅鑲藍四旗在西其前各列漢軍火器營四滿洲火器營四次前鋒營一次護軍營驍騎營相間各四每營橫二十有四丈縱四十丈前後相隔各一丈翼日總理閱兵王公大臣督諸軍各宿軍幕禁止譴譁依分建纛金鼓甲仗威儀悉備

右立軍幕

前一日鑾儀衛陳

大駕鹵簿步軍統領勒所部辟除

御道左右

皇帝乘輿出宮幸

行宮導從大臣侍衛前後扈從王公百官接

駕送

駕如儀

詳吉禮
南郊儀

右鑾駕幸行宮

屆日五鼓鑾儀衛陳騎駕鹵簿樂部陳鐃歌樂於
行宮門外乃饗軍士食

命王大臣率內務府官監視之既畢饗諸軍皆貫甲出
營列陣列陣之制去陣前百四十有七丈建大纛
以爲軍表左翼鑲黃正白鑲白正藍以次而東西
上右翼正黃正紅鑲紅鑲藍以次而西東上陣內
諸軍各按旗依表爲隊最前爲漢軍火器營滿洲
護軍火器營驍騎火器營並列而各別其隊漢軍

驍騎火器營每旗鹿角二十長槍二十連枷棍二

十綿甲兵八十人左右引繩兵各四人神威將軍

礮十各載以車掌礮車兵百十人礮手三十人鳥

槍百護礮鳥槍兵百人叅領礮十執礮兵三十人

小旗二十負旗領催二十人紅旗二麾旗領催二

人金五鳴金兵十人鼓一皋鼓兵四人擊鼓兵二

人號螺五鳴螺兵五人領以叅領二人散秩官十

人驍騎校十人漢軍鳥槍營每旗礮一執礮領催

一人護纛兵三人隨纛散秩官一人領催二人兵
二十人叅領纛五執纛兵十有五人紅旗二麾旗
領催二人烏槍二百二十負小旗領催二十人兵
二百人金五鳴金兵十人鼓一舁鼓兵四人擊鼓
兵二人號螺十有三鳴螺兵如其數領以叅領二
人散秩官五人給使官二人驍騎校七人每翼統
以都統二人每旗副都統一入滿洲驍騎火器營
每旗纛一執纛兵二人子母礮六

行則駕以馬發
則就地支以木

架左右高下
視遠近爲節

每礮小旗一負旗隨礮領催一人兵

九人領以叅領一人散秩官五人驍騎校五人護

軍烏槍營每旗纛二執纛護軍四人紅旗一麾旗

護軍二人小旗十有二負旗什長如其數烏槍百

二十烏槍護軍如其數號螺十鳴螺護軍如其數

領以護軍叅領二人護軍校十有四人驍騎烏槍

營每旗纛二執纛兵四人紅旗一麾旗兵二人小

旗十有二負旗領催如其數烏槍百二十烏槍兵

如其數號螺十鳴螺兵如其數領以叅領二人散
秩官七人驍騎校十有四人統以火器營大臣五
人合漢軍滿洲火器營統兵大臣十有七人將校
七百十有二人兵八千三百七十有六人其後間
二十有五丈爲首隊兵八旗前鋒居中八旗護軍
驍騎各按翼按旗分列前鋒左右前鋒營每佐領
出前鋒一人每前鋒二人用烏槍前鋒一人每旗
撥前鋒校八人建小旗八螺五負旗鳴螺兵如其

數合爲一隊列於各旗漢軍火器之次領以前鋒
叅領一人前鋒侍衛一人統以每翼前鋒統領一
人護軍營每佐領出護軍二人合四人建小旗一
每旗建護軍統領大纛一護以護軍叅領五人統
以每翼護軍統領一人驍騎營每佐領出領催驍
騎二人合四人建小旗一每旗號螺七叅領纛七
護以叅領二人散秩官二人驍騎校二人統以每
翼都統二人每旗副都統一人合首隊前鋒護軍

驍騎統帥十有六人將校二百九十有六人兵四千四百十人中分前鋒營統領一人叅領二人侍衛二人前鋒二百人護軍營統領一人叅領八人護軍四百人驍騎營副都統二人叅領八人散秩官十有六人驍騎校十有六人驍騎三百二十人再於滿洲火器營內分鳥槍護軍叅領四人鳥槍護軍百六十人鳥槍驍騎叅領二人鳥槍散秩官四人鳥槍驍騎百六十人於退軍時爲殿又後間

十有五丈爲次隊兵八旗護軍驍騎各按翼按旗
分列護軍營每佐領出護軍三人每六人建小旗
一每旗各建護軍統領大纛一號螺六領以護軍
叅領三人統以每翼護軍統領一人驍騎營每佐
領出驍騎一人每四人建小旗一每旗各建叅領
纛四號螺四每叅領下出散秩官一人驍騎校一
人領以驍騎叅領一人統以每翼都統一人副都
統一人合次隊護軍驍騎統帥八人將校百四十

有四人兵三千五百二十有八人大軍左右分張

兩翼爲協隊按旗相屬斜行鴈綴成列護軍營每
佐領出護軍一人每四人建小旗一每旗各建護
軍統領大纛一護以護軍叅領二人統以每翼護
軍統領一人驍騎營每佐領出驍騎一人每四人
建小旗一每旗各建叅領纛三號螺三每叅領出
散秩官一人驍騎校一人領以驍騎叅領一人統
以每翼都統一入副都統二人合協隊護軍驍騎

統帥八人將校百三十有六人兵千七百六十有

四人

御營外左右設鑾儀衛蒙古畫角十鑾儀官七人鳴角
軍二十有一人其前設五旗諸王蒙古畫角十官
十人鳴角軍二十人承傳鳴螺親軍十有二人按
步撥乘騎斜行接至鹿角前八旗護軍每旗各出
護軍叅領一人護軍校一人護軍四十人滿洲蒙
古漢軍合委散秩官八人驍騎校八人驍騎三百

二十人禁約謹誨又合委傳宣官八人驍騎校八人護軍校八人承傳軍令總大閱之衆統帥凡四十有九人將校凡千三百六十有一人步騎卒伍凡萬八千七百七十有一人辨旗纛之等正黃正白正紅正藍四旗各如其色體尚方鑲黃鑲白鑲藍以朱鑲紅以白體方末銳護軍旗斜出末銳皆繒金龍裁朱繒爲火猷上綴朱纓紅旗則綴黑纓滿洲護軍驍騎火器營暨護軍營驍騎營皆於旗端

標識號帶驍騎帶色從本旗其將領纛上飾豹尾
護軍帶色以白將纛豹飾如之漢軍火器營將纛
製小及半文以飛虎前鋒護軍建方旗如其旗之
色將纛豹飾如之諸軍指麾小旗惟不裁火燄餘
製並如前式辨甲冑之別八旗驍騎鎧甲從其旗
之色冑纓將以朱軍以黑八旗護軍鎧甲將以白
軍以藍冑纓將以黑軍以朱漢軍營弁鹿角軍衣
褸褙無袖施駁軍不介冑衣罽袍短鎧餘軍士各

從其旗之色若統帥大臣甲則細鎧冑則飾貂尾
鴈翎各以其等諸軍既成列司礮以三礮列於軍
前乃各息聲待令

右列陣

軍陣既嚴兵部尚書侍郎詣

行宮奏成列司礮舉礮三銃歌大樂作奏壯軍容之
章

皇帝乘騎出行宮侍衛二十人前引大臣十人騎而導

後護領侍衛內大臣二人侍衛班領率豹尾班侍衛執槍十人佩刀十人佩弓矢十人騎而從

駕入

御營

躬御甲冑扈從王公大臣侍衛親軍咸擐甲侍班滿漢九卿記注官蟒袍補服豫於

御營前恭頌兵部尚書奏請

閱兵

皇帝佩刀出

御營屬橐鞬乘騎前張黃龍曲蓋一武備院官掌之兵
部尚書侍郎二人騎導前引後扈如前儀總理閱
兵王公大臣滿大學士乘騎隨從三旗內大臣散
秩大臣率親軍舉黃龍大纛三旗侍衛親軍各從
侍衛什長親軍校隨纛扈

蹕有執事王公附豹尾班後隨行

皇帝入自左翼出右翼由列陣中路行經驍騎護軍前

鋒諸隊前火器營諸隊後陣前將校甲士各就列
迴身以向恭俟

駕過後如初

皇帝周視隊伍畢還至

御營前降騎釋橐鞬

御幄殿諸大臣侍衛咸降騎隨入前引大臣分立殿
前東西面後扈大臣侍衛翼立

御座左右

殿外東西列豹尾班侍衛建黃龍大纛各一侍衛親
軍按隊環衛總理閱兵王公大臣大學士兵部尚
書侍郎立於殿外階上西位東面執事王公侍班
九卿記注官分翼立於階上東西面

御營前左右列侍衛各六人八旗傳令官在其下均立
馬以竢滿洲索倫蒙古善馭馬侍衛三十人不攔
甲按翼立侍衛後備馭驚軼之馬

皇帝賜王公大臣坐各就位一叩坐屆時兵部尚書出

班跪奏鳴角開操興復位鑾儀使帥鳴角軍進

御營前蒙古大角鳴承傳海螺以次遞鳴達於軍陣司
礮三舉礮諸軍陣內擊鼓螺角畢鳴承傳之鳴螺
兵返騎以次退至

御營左右乃行陣擊鼓鳴螺昇鹿角整隊前行鳴金止
一字成列領隊甲士麾紅旗槍礮齊發鳴金止再
擊鼓鳴螺整隊而進鳴金麾旗發槍礮如是者九
初進以二十丈再進以七丈五尺爲率至第十進

大小礮連環槍齊發無間鳴金三乃止開鹿角爲
八門首隊前鋒護軍驍騎甲士以次出次隊軍隨
之火器營兵列於後鹿角門闔諸軍出鹿角外既
成列八旗齊鳴螺譟而進左右翼兵鴈綴斜行成
列並進軍中鳴金止乃鳴螺振旅而還爲殿之滿
洲火器營軍及首隊前鋒護軍驍騎各立於本旗
軍表之下八旗漢軍火器營分鹿角爲八行本旗
都統建龍纛整隊而退首隊兵殿後兵均鳴螺結

隊徐還各列於初成列之地兵部尚書出班跪奏
大閱禮成

皇帝入

御營釋甲胄扈從王公大臣侍衛各退咸解甲具吉服
隨

駕還行宮司礮舉礮三銃歌清樂作奏樂皇威之章將
帥各率弁兵按隊歸營解甲徹幕申嚴約束依次
入城

右大閤

翼日鑾儀衛陳

大駕鹵簿

皇帝乘騎回鑾警蹕如前儀

駕還宮羣臣奉叅

起居

恩賜賞賚各有差

右禮成還宮

京營八旗弁兵每歲春秋季月合操四次春日貫甲
秋日常服營陣規制如

大閱儀仲春孟秋之月按旗登城習鳴螺兵部遣官稽
閱歲爲常制護軍驍騎官兵一歲三校騎射本旗
都統臨視之前鋒護軍三歲一校騎射兵部疏上
領侍衛內大臣八旗都統副都統各每翼

欽命數人會本翼統領臨視之八旗滿洲漢軍火器營
礮間三歲季秋月演試於蘆溝橋都城各門之礮

分三之一更遞運往同演

命兵部滿尚書一人臨視之

右京營訓練

直省講武以督撫提鎮爲闡帥每歲季秋霜降日
申令本標弁卒校閱於演武場前一日各營將弁
肅隊伍赴校場豫立軍幕屆日黎明軍士擐甲列
陣中軍建大纛於場正中閫帥以牲醴致祭行二
跪六叩禮中軍以下將士均隨行禮畢軍門鼓吹

節鉞前導閫帥徧閱行陣還登將臺升帳儀衛左右分列諸將擐甲侍臺下中軍詣帳前上行陣圖式請令操兵乃舉旗麾衆合操臺下舉礮三軍中鳴角擊鼓步騎甲士聞鼓聲依式前進鳴金則止行陣中施發鳥槍連環槍並如


京營之製餘若長槍藤牌副刀短兵之屬各因其地之宜以教士卒皆有成法其爲陣有正有變每變陣視將臺號纛爲指麾之節臺上鳴角三軍中乃

鳴金振旅而還閱畢試材官將士騎射技勇申明
賞罰犒勞軍士各釋甲歸營伍漕運河道總督屆
期訓練本標弁卒亦如之八旗水師操防之畧練
習於四時其出洋信候直省不同每歲春秋季月
或夏秋之季遇潮平風正日乘戰艦列陣張颿馭
風鳴角發礮具如軍律將軍都統副都統親臨校
視綠旗水師訓練亦如之駐防將軍都統副都統
訓練八旗弁卒及演礮如

京營之制

右直省閱兵

欽定大清通禮卷三十九



總校官庶吉士 臣 張能照

校對官庶吉士 臣 翟槐

謄錄舉人 臣 陳紹貴

謄錄貢生 臣 王嘉稷

欽定四庫全書薈要

史部

欽定大清通禮卷

四十四至
四十四

詳校官編修臣繆晉

欽定四庫全書薈要卷八千三百七十

欽定大清通禮卷四十

軍禮

皇帝親征之禮

命下內閣諏啓行吉日以

聞兵部承

制宣攝內外諸司各隨職供備從征將士部勒禁旅前

後備六軍

頒行軍律令

右諏吉戒辨

前期三日遣官各一人祇告

天

地

宗廟

社稷

太歲如常儀

右告祭

屆日遣官致祭

道路之神於

天安門外列礮於演武場遣八旗都統

或副都統

致祭

司礮之神均如儀鑾儀衛陳

騎駕鹵簿於

午門外前列饒歌大樂金二金鉦四鉦二鼓二點二
遂四雲璈二管二笙二金口角八大號小號各八

次御仗六吾仗六立瓜六臥瓜六星六鉞六次五色銷金小旗十五色銷金龍纛十次單龍赤扇六雙龍黃扇六五色四季花繖十次豹尾槍護軍十人佩弓矢親軍十人佩儀刀親軍十人凡親軍護軍均乘馬擎執以旗尉乘馬如之

堂子街門外左右列蒙古畫角十有六海螺二百親軍護軍分掌之兵部設

御營黃龍大纛於

堂子內門外之南內大臣侍衛守之設八旗羽林纛八
火器營纛八按翼分列於黃龍大纛後各以本旗
叅領一人守之不從征王公暨滿一品官蟒袍補
服從征王以下大臣服征衣佩刀豫往

堂子街門內東面祇俟從征六軍分翼列陣於都門外
司礮官設三礮於軍前步軍統領勒所部辟除
御道所司以

皇帝行營次舍先發屆吉時禮部尚書侍郎詣

乾清門請

駕

皇帝御征衣佩刀出宮乘騎前列九龍華蓋一武備院
卿騎導領侍衛內大臣侍衛咸服征衣佩弓矢乘
騎前後翊衛

午門鳴鐘鼓

騎駕鹵簿前導樂陳而不作

駕至長安橋軍士吸角吹螺

駕入

堂子街門王公以下跪候過興隨入武備院官豫布

皇帝拜褥於

圜殿外甬道正中及

旗纛前鑾儀衛移鹵簿起

堂子至

駕所出都門外

皇帝降騎角螺止禮部尚書侍郎恭導由內門中門

入就

圜殿外拜位南向立前引大臣止立門外後扈大臣隨侍鴻臚寺官引王公位丹陛上引衆官位丹墀東西鳴贊奏跪拜興

皇帝行三跪九拜禮王公等隨行禮畢螺角齊鳴禮部尚書侍郎恭導

皇帝出

堂子內門詣

旗纛前望纛行三跪九拜禮

贊不

王公等隨行禮畢角

螺止

皇帝乘騎導迎樂作奏祐平之章辭曰禋祀隆永維統
百靈延福諸祉奠安神鼎脩祀祠通紫庭降福祥
昭德馨領侍衛內大臣侍衛班領率親軍護軍舉
黃龍大纛扈

蹕王公以下咸騎從

右告祭堂子

駕出都門至陳兵處司礮三舉礮各旗滿漢將弁士卒咸於馬上屏息俯伏候過整隊隨行

駕至郊不從征王以下文武百官咸蟒袍補服跪送候過興皆退六軍經行之地有司豫脩橋梁平道路直省文武大臣出境迎候三品以下守土官迎於本界外藩王公率屬迎於所部皆蟒袍補服紳士耆民結采於門設香案跪接均與

時巡同

右鑾輿進發

車駕既載途大軍分隊前驅旗尉韜鹵簿領侍衛內大

臣侍衛翼

駕行庀

駐蹕行營周視地勢建

御營於正中前鋒軍過

御營前分列東西二營遠斥候八旗護軍及驍騎張左

右翼分列十六營火器營軍礮軍綿甲軍列為四

營外藩軍附左翼列為一營綠旗軍各自為營皆環

御營為向

御營內張帳殿黃幄周以黃幔為城南設旌門列黃龍大纛於門外左右環城巡警二十有一處領侍衛內大臣侍衛率親軍周巡宿衛幔城外設網城東西南樹旌為三門環城設巡警八處護軍統領各率羽林護軍森嚴守衛禁語譁稽出入網城外布

幕爲重營東西南北各爲一門護軍叅領侍衛鑾儀衛官及護軍執事人每重扈蹕閣部院寺從征各官列幕於重營之外大軍分翼牧馬前軍牧於路左留路右以待後軍牧放禁毋越次

駕駐行營升斲三諸軍悉止從官奏事如常儀夜漏初下嚴更鼓禁斷行人內外禁旅各分番巡警五漏交

御營鳴鐘前營角聲起角聲初嚴外營蓐食治軍裝再

嚴前軍拔營徐進三嚴左右軍後軍輜重悉發從
征王公百官恭謁於旌門外辨色升殿警蹕

皇帝乘騎出營翊衛如儀羣臣隨後騎從

右軍營駐蹕

軍行所至隨時遣使致祭

名山

大川及風雨之神各如儀將及所征之地遣使齋

勅往諭不庭

親御軍門簡閱將士申嚴紀律諸軍秉
睿謨宸算分道進發秦克捷乃班師

右徂征

皇帝親征既克有罪乃諏吉凱旋徧布六軍戒辦前期
一日遣官致祭

旗纛之神如儀屆日

鑾輿先發諸軍整旅徐旋所在有司治橋梁道路外藩
王公直省文武大臣暨守土官紳士耆老恭迎如

初

駕將至京內閣宣下諸司傳告在京王公百官咸蟒袍

補服郊迎至日鑾儀衛陳

法駕鹵簿自郊外五里至

堂子門外

駕至郊王公百官跪候過輿隨行

駕入都門大樂鼓吹前導至

堂子內門禮部尚書侍郎恭導

皇帝降輿致祭

堂子如初儀王公等均隨行禮畢鑾儀衛移設鹵簿起
堂子至

午門外

皇帝乘輿入東長安門至

午門百官跪候過興王公隨入至內金水橋候
駕還宮皆退

右凱旋

大師凱旋翼日遣官祇告

天

地

宗廟

社稷

太歲並遣官致祭

陵寢及隨征

旗纛

司礮之神

右告至

廼行飲至之禮燕從征將士於

御苑

皇帝親勞之策勲行賞各有差

右飲至策勲

禮部諏吉䟽請

御殿受賀宣布諸司戒辦屆日鑾儀衛陳

法駕鹵簿樂部和聲署陳樂懸侍班執事官王公百官

朝服咸集

皇帝御太和殿受中外羣臣表賀如朝賀儀

頒詔布告天下

詳見嘉禮

分遣京堂四品以上官致祭

嶽鎮海瀆

前代帝王

先師闕里

右舉行慶典

御製碑銘勒石太學以告成功編次

親征方畧宣付史館

右告成紀功

命將出征之禮

皇帝命大將軍統帥諸軍出討寇亂先期內閣大學士

擬銜名奏請

欽定既得

旨禮部製印欽天監諏啟行吉日送內閣以

聞兵部徧布諸司供備前期三日昧爽鴻臚寺官豫設
勅印案於

太和殿內東楹之南內閣侍讀二人自閣奉

勅印入陳於案各退鑾儀衛率官校陳

法駕鹵簿樂部率和聲署陳樂懸王公百官咸蟒袍補

服入就班位序立如常朝儀

詳見嘉禮

出征大將軍暨

從征各官蟒袍補服入蒞於丹墀之東西面禮部

尚書侍郎詣

乾清門請

駕

午門鳴鐘鼓

皇帝龍袍補服乘輿出宮導從扈衛如常儀至

太和殿北階降輿入工舉麾鼓祝中和韶樂作奏隆
平之章辭曰臨軒策將聖武恢仙仗挾風雷龍驤
虎賁羣英來專閫正藉勒銘才神機翊上台恩隆
轂是推

皇帝御太和殿陞座工偃麾憂敵樂止鑾儀衛官傳鳴

鞭階下三鳴鞭戲竹交丹陛樂作奏慶平之章辭

曰金殿宸開銅龍啟推轂恩隆典儀九重上爭歌

喜起敷聲教盡仰天威鴻臚寺官引大將軍升自

東階立丹陛之東北面接勅印官二人

以從征內閣官充之

從升立於左西面分引從征各官按左右翼就丹

墀東西拜位均北面序立贊進少進贊跪皆跪樂

暫止贊受

勅大學士一人入

殿左門就東案奉

勅由中門循左闌出授大將軍大將軍祇受轉授接勅
官跪奉以興退踈於左贊受印大學士一人奉印
授大將軍如受

勅儀樂作贊叩興大將軍暨從征各官行三跪九叩禮
興樂止奉勅印官降自東階由

太和門中門出大將軍從出從征各官皆出鑾儀衛

官傳鳴鞭如初

駕興中和韶樂作奏顯平之章辭曰絳霄瑞靄六龍迴
寰寓靖氛埃天戈遙指閭闔開敦忠秉信閭外裁
風雲列陣該崇墉計日摧鋒車電掣天馬來軍聲
歡騰九垓

皇帝還宮樂止王公百官咸退

右頒勅印

出師日五鼓鑾儀衛陳

法駕鹵簿於

午門外如常儀文武百官蟒袍補服按翼集

午門外東西闕下大將軍暨從征各官服征衣王貝勒貝子公滿大學士將軍都統尚書蟒袍補服均東面豫竢於

堂子街門內兵部建八旗大纛各一於

堂子內門外之南軍士執螺角列竢於街門外從征將士按翼分立於甬道左右質明禮部尚書侍郎詣

乾清門請

駕

皇帝龍袍補服乘輿出宮

午門鳴鐘鼓

法駕鹵簿前導樂陳而不作百官跪送如常儀

駕至長安橋軍士吸角吹螺大將軍從征各官暨王公

大臣等跪候過輿隨行

駕進

堂子街門螺角止禮部尚書侍郎恭導

皇帝降輿就位行禮如儀羣臣咸隨行禮畢恭導

皇帝出

堂子內門螺角齊鳴

皇帝至燾前行禮大將軍暨從征各官均隨行禮畢螺
角止導迎樂作奏祐平之章辭曰維文武畧勲業
猷崇欽承睿算往征不恭扇仁風在師中月三捷
奏膚功

午門鳴鐘

皇帝回鑾是日並遣官以師行祇告

奉先殿如常儀

右祇告

其日昧爽工部官豫張黃幄於東長安門外南向

武備院官供

御座鋪陳光祿寺官備酒以俟

皇帝祇告

堂子禮畢王公大臣先至東長安門分異序立大將軍
暨從征將士先至幄外恭俟

皇帝至幄前降輿羣臣跪迎入幄

陞座內大臣侍衛翊立左右

皇帝召大將軍入

親賜卮酒大將軍跪飲畢退率從征將士謝

恩行三跪九叩禮畢佩橐鞬辭

駕

皇帝命乘馬乃各乘馬啓行樂作

皇帝乘輿還宮王公百官送

駕如儀各退乃遣官祖餞大將軍於都門外禮部官豫
張幕於門外道左望

闕設畫屏香案案前布拜席內務府官設燕於幕內
光祿寺官備茶酒俎於幕側鴻臚寺官二人蟒袍
補服俎於香案左右承

旨餞送之王公大臣侍衛各官蟒袍補服俎於幕外大

軍按翼肅隊夾道東西分列大將軍至下馬從征
各官咸下馬王公大臣侍衛迎入鴻臚寺官引就
拜位聽贊行三跪九叩禮畢鴻臚寺官分引就燕
席禮部兵部尚書侍郎奉茶燕畢望

闕謝

恩行禮如初儀王公大臣侍衛送至幕外視大將軍啓
行各退

右祖餞

或王公大臣先出師疆場

皇帝即軍中

命爲大將軍先期

臨軒遣正副使各一人持

節齋

勅印以往至日大將軍率屬郊迎豫於演武場築壇備
鋪陳壇上正中設勅印案前爲香案均南向執事
及所屬官弁咸集祇俟屆時正副使蟒袍補服登

壇陳

勅印於案退東面立大將軍蟒袍補服詣香案前引贊贊跪大將軍跪宣勅官東面宣讀

勅文訖正使奉

勅副使奉印以次授大將軍大將軍祇受轉授從官跪接興復於案贊叩興大將軍行三跪九叩禮興正副使退大將軍奉

勅印蒞事正副使還

朝持

節復

命如儀

右遣使頒勅印

大將軍戰勝滅寇諏吉凱旋先期具疏以
聞乃振旅還

朝將至

京師先遣官入奏

皇帝命廷臣以茶酒出郭迎勞大將軍率從征將士望闕謝

恩行三跪九叩禮畢還

朝從征將士以次歸營伍翼日黎明鹵簿樂懸陳設王公百官陪位均如

頒勅印儀鴻臚寺官陳設黃案於丹陛正中屆時

皇帝御太和殿中和韶樂作秦隆平之章辭曰慶溢朝端靄祥雲河山清晏鈴旗迢遞送歸鞭赫元戎繫

良翰靖獻寸誠丹載干戈和佩鸞功成萬里勒銘
還遐邇共騰歡

陞座樂止大將軍出班從征內閣官二人恭奉

勅印升丹陛大將軍詣案前跪以次恭納

勅印於案退就班位丹陛樂作奏慶平之章辭曰決勝

從容籌上將師行肆靖遐方宣武畧更敷文德垂

衣治端拱明堂大將軍乃率從征將士謝

恩聽贊行三跪九叩禮畢樂止

駕興中和韶樂作奏顯平之章辭曰雉扇徐迴遍堯封齊
銷烽燧依依楊柳六師歸逮春耕脩農耒論賞策勲
隨九重深五紘揮敷天率土裒時對日月耀明威
皇帝還宮樂止羣臣咸退

右凱旋

如窮寇乞命請降乃封章入

告得

旨報可諏吉納降所司豫於大軍之左築受降壇南向

壇南百步外樹表建受降旗將校守之屆日所司

詣壇鋪陳設大將軍座於壇上正中設案於座南陳
勅印設參贊大臣座於左右東西僉向侍衛記室官立
大將軍左右引禮立壇南左右將領按隊伍立壇
下左右均東西面按品爲序北上從征軍士戎服
按翼肅隊陳列壇外至時兵部總尉領降人立受
降旗表下祇誼引禮二人詣軍門請大將軍升壇
軍門鼓吹三舉礮大將軍戎服乘騎出營鼓吹節

鉞前導引禮官騎導叅贊大臣暨侍從官騎從節
鉞將至壇兵部總尉揮降人於表前北面跪匍伏
大將軍至壇前下馬羣官咸下馬引禮引大將軍
陟中階登壇南面升座叅贊大臣以下咸就位鼓
吹振作舉礮三兵部總尉揮降人膝行詣壇下匍
伏乞命大將軍宣諭

皇帝威德受降量加賞賚降人泥首伏謝仍膝行退大
將軍降座乘騎還營軍門鼓吹舉礮導引侍從如

初乃露布以

聞率大軍凱旋如前儀

右納降

師旋諏吉祗告

天

地

宗廟

陵寢

社稷

先師孔子並致祭

旗纛

敝神各如儀羣臣恭進

賀表

皇帝陞殿受賀如朝賀儀

御製碑銘勒石太學分

命儒臣編纂方畧垂示武功乃燕勞大將軍諸從征者

咸與燕

儀詳嘉禮

翼日論功行賞有差

右告成燕賚

若

命重臣經畧軍務節制將帥出征不庭其

頒勅印祭

堂子餞送受降凱旋之儀均與大將軍同

欽定大清通禮卷四十

欽定四庫全書薈要卷八千三百七十一

欽定大清通禮卷四十一

軍禮

大軍出征奏捷上所獲於

京師乃獻俘於

太廟

社稷祇告成事獻俘

太廟之禮前期有司諏吉以

聞翰林院撰祝文

祝辭隨時撰擬

太常寺以祝版送內閣恭書

受而奉諸

神庫承祭官執事官應陪祀之文武百官咸致齋御
史禮部光祿寺官祇割牲均如儀屆日五鼓宗室
官入

廟恭請

中殿神位奉安於

前殿供備陳設陪祀執事各官詣

廟祇族均朝服兵部司官朝服率解俘將校豫以白組繫俘頸由西長安門至

天安右門入候於

太廟街門外黎明承祭官朝服至俘跪伏承祭官入

廟就位陪祀執事各官咸就位立祇告獻俘讀祝行三獻禮陪祀官均隨行禮是日並遣官告祭

後殿凡陳設行禮儀節並與時饗同

儀詳吉禮

右太廟獻俘

同日獻俘

社稷前期有司供備翰林院撰祝文陪祀王公百官致齋均如祭

太廟之儀屆日獻俘

太廟禮畢兵部司官以俘候於

社稷街門外承祭官朝服至俘跪伏承祭官就拜位行禮陪祀官均隨行禮凡陳設及行禮儀節並與春

秋祈報禮同

儀詳吉禮

禮畢兵部司官以俘仍由原入

之門出各官皆退

右社稷壇獻俘

獻俘翼日

皇帝御午門受俘受俘之禮前期兵部徧布諸司戒辦
屆日工部官設

御座於

午門樓正中武備院官張黃蓋於樓檐下鑾儀衛官

陳

法駕鹵簿樂部和聲署陳樂懸設饒吹軍樂於樓下設
丹陛鹵簿左當

闕左門之北右當

闕右門之北靜鞭仗馬在其次設丹墀鹵簿於

闕左門

闕右門之南金鼓在其次丹陛大樂在金鼓之次輦
輅設於

天安門外金水橋南馴象設輦輅南均夾甬道分列

如儀鴻臚寺序定班位內大臣率侍衛蟒袍補服
立兩翼樓階上護軍統領率護軍立階下均佩刀
環衛前引大臣十人立樓檐外階上東西面後扈
內大臣二人在

御座旁左右僉立豹尾班侍衛佩刀侍衛在

御座後左右翼立記注官立前楹之西東面北上承

旨大臣二人鴻臚寺鳴贊二人立於階下東西面鑾儀

衛傳鳴鞭官立西鳴贊官之次東面均北上侍

儀內閣大學士學士翰林院學士都察院左都御史

副都御史立丹陛鹵簿之北東西面糾儀御史四人禮部司官四人鴻臚寺官四人立丹陛鹵簿之南又御史四人禮部司官四人鴻臚寺官四人立丹陛鹵簿之南均東西面北上王貝勒貝子公拜位在丹陛鹵簿內甬道東西文武百官拜位在丹陛鹵簿內甬道東西重行異等均北面東位西上西位東上兵部刑部尚書侍郎立於西丹陛鹵簿

之後

右陳設序位

漏未盡王公朝服立

闕左右門北百官朝服立

闕左右門南均按翼東西祗候兵部司官率解俘將校以俘由西長安門至

天安右門入立於右翼金鼓之後刑部司官立兵部官之次黎明執事官咸就位禮部尚書侍郎詣

乾清門奏時遂前導

駕

皇帝禮服乘輿出宮前引後扈如常儀

午門鳴鐘鼓

駕至

太和門大樂銑吹金鼓振作禮部尚書侍郎恭導

皇帝登

午門樓至前楹降輿

御黃幄

陞座畢樂止鑾儀衛官傳鳴鞭校尉三鳴鞭鳴贊贊進停

丹陛樂作奏慶平之章

樂辭詳見
命將凱旋儀

序班引解

俘將校自丹墀鹵簿之南進至

御道西北面贊進少進贊跪叩興將校行三跪九叩禮
興樂止贊退引將校退復原位立鳴贊贊受俘兵
部司官率將校以俘至右翼金鼓之下北面跪鹵
伏兵部尚書趨至

午門前

御道西跪奏平定某地所獲俘囚謹獻

闕下興少退東面立刑部尚書趨至兵部尚書之右
承

旨大臣傳

制鴻臚寺官接宣曰所獻俘交刑部刑部尚書趨進北
面跪領

旨訖興偕兵部尚書退復位兵部司官以俘交刑部司

官械繫由原入之門出鳴贊贊齊班丹陛樂作序
班分引王公百官各就拜位立聽贊行禮如常儀
畢樂止鳴鞭如初

駕興大樂銑吹金鼓振作

午門鳴鐘

皇帝乘輿還宮樂止衆官皆退是日

賜解俘官兵燕於兵部翼日

午門外

賜解俘官兵冠履銀幣有差

右受俘

欽定大清通禮卷四十一

欽定四庫全書薈要卷八千三百七十二

欽定大清通禮卷四十二

軍禮

日食救護之禮前期五月欽天監豫推

京師各省及蒙古諸部落朝鮮國所見日食分秒時刻疏

聞下禮部徧布中外屆期祇行救護前一月具疏傳在京文官漢武官會禮部行救護禮八旗滿洲蒙古

漢軍都統副都統率屬於所部警備各救護於公署至日順天府官飭役赴部潔埽堂署內外設香案於露臺上鑪檠具

早晚隨日爲向

布百官拜席於香案

後鑾儀衛率官校至部陳金鼓於儀門外龍旗御仗各二引仗各六鼓二十有四金鉦一畫角十有二掌以民尉列甬道東西百官朝服詣部祇候乃辨位宗人府吏部翰林院詹事府通政司吏科國子監爲一班內閣戶部戶科禮科太常寺鴻臚寺

欽天監爲二班兵部兵科理藩院鑾儀衛上駟院
武備院太僕寺步軍統領及漢武官爲三班刑部
都察院大理寺刑科光祿寺順天府京縣五城爲
四班內務府工部工科中書科太醫院爲五班每
班皆禮部尚書侍郎一人領之禮部官屬各附於
班末糾儀御史四人禮部司官四人鴻臚寺鳴贊
二人序班二人分列於香案前左右欽天監博士
一人候時樂部署史二人奉鼓竽於露臺下欽天

監官報日初虧鳴贊贊齊班序班引百官至拜位
前立重行異等贊進少進贊跪叩興衆行三跪九
叩禮興贊上香禮部尚書進至香案前三上香畢
復位贊跪皆跪贊伐鼓署史奉鼓進跪於左禮部
尚書伐鼓三聲儀門外金鼓振作乃按班更番上
香祇跪御史禮部鴻臚寺官更番祇立並如前儀
欽天監官報日復圓金鼓聲止鳴贊贊齊班百官
至拜位前立聽贊行禮如初畢各退是日禮部祠

祭司官二人欽天監博士二人赴觀象臺測驗向日設香案初虧復圓行三跪九叩禮如儀

右日食救護

月食救護於太常寺前期欽天監禮部疏

聞屆日陳設執事及行禮儀節並與救護日食禮同
右月食救護

直省府州縣衛遇日月食各按欽天監推定時刻
分秒隨地救護省會於督撫署府州縣衛各於公

署均以督撫及正官一人領班行禮正貳教職二人糾儀學弟子員二人通贊二人引班陰陽官一人報時至日班首官上香伐鼓衆官祇跪行禮並與

京師救護同

右直省救護

欽定大清通禮卷四十二

欽定四庫全書薈要卷八千三百七十三

欽定大清通禮卷四十三

賓禮

周禮大行人掌賓客之禮儀九州以外謂之蕃國
各以其貴寶爲摯

國家聲教暨訖四夷來賓徼外山海諸國典之禮部
百餘年來

勅封燕賚諸典儀文詳洽爰輯爲賓禮而百官士民相

見儀節以類附於後

朝貢之禮凡四夷屬國按期脩職貢遣其陪臣齎表文方物來朝

京師貢使將入境朝鮮以禮部通官二人迎於

盛京鳳凰城安南琉球緬甸暹羅荷蘭蘇祿南掌諸

國貢道所經之省督撫遣佐貳雜職官一人迎於

邊界西洋以內務府司官及西洋人供職欽天監

者各一人迎於廣東皆給以郵符經過地方有司

供其次舍廩餼車舟夫馬沿途營汛遞遣官軍防護以達於

京畿禮部豫行工部脩飾館舍備器用薪炭戶部給粟米芻豆光祿寺給牲魚酒漿蔬果之屬既至提督會同四譯館鴻臚寺少卿飭屬接入館以時稽其人衆均其飲食

右迎來

貢使就館翼日檢其方物表文暨從官各服本國

朝服以俟禮部儀制司官設表案於堂上正中
明館卿朝服率貢使詣部由左角門入恭俟階下
之左正使奉表在前副使次之從官在後禮部侍
郎一人出詣案左立儀制司官二人鴻臚寺鳴贊
二人分立於左右楹南均朝服館卿先升階立左
楹鳴贊之右鳴贊贊進表司賓序班二人引貢使
升階立副使從升少後立從官隨序立贊跪貢使
以下皆跪贊接表正使舉表館卿恭接以授侍郎

侍郎受表陳於案正中復位贊叩興正使以下行
三跪九叩禮興序班引退館卿率以出儀制司官
送表內閣矣

命下禮部以方物分納所司

右進表貢方物

貢使上表訖恭遇大朝常朝

皇帝御太和殿百官行禮畢序班引貢使暨從官詣丹
墀西班末聽贊行禮

賜坐

賜茶如儀

詳見嘉禮

若不過朝期禮部諏日奏請

召見館卿豫戒貢使及通事官習肄禮儀至日率貢使服其國公服通事補服詣

宮門外祗候

皇帝常服

御便殿領侍衛內大臣內大臣侍衛左右侍立如常儀禮部尚書一人蟒袍補服引貢使入通事隨入至

丹墀西行三跪九叩禮畢引由西階升至

殿門外跪

皇帝降

旨慰問禮部尚書承傳通事轉諭貢使貢使對詞通事
譯言禮部尚書代奏禮畢興引自西階降出退如
待以優禮是日

皇帝御便殿侍衛如前議政大臣暨八旗大臣咸蟒袍
補服入

殿按翼侍立禮部尚書引貢使至丹墀西行三跪九叩禮興引由西階升入

殿右門立右翼大臣之末通事隨入稍後立

皇帝有

旨賜坐領侍衛內大臣內大臣議政大臣八旗都統副都統禮部尚書就立位一叩序坐貢使隨跪叩坐乃賜茶尚茶進

皇帝茶衆跪叩侍衛徧授大臣及貢使茶咸跪受一叩

坐飲畢跪叩如初

皇帝降

旨慰問貢使跪聆答奏皆禮部尚書承傳通事譯言如
前儀禮畢禮部尚書引貢使出至朝房承

旨賜貢使尚方飲食訖館卿率以退翼日黎明領赴
午門外謝

恩鴻臚寺傳贊序班引班貢使就丹墀西北面行三跪
九叩禮如儀退

右朝見

朝貢禮畢禮部疏請頒

賜國王並燕賚貢使及其從官從人既得

旨移諸司供備屆日所司陳

賜物於

午門外道左皮幣布帛白金陳於案馬陳於庭鞍轡

具

惟朝鮮國王及貢使

賜馬

館卿朝服率貢使暨從官各服

其國朝服由東長安門

天安門

端門至西朝房前東面序立祇候禮部侍郎一人立
案南西面主客司官從立御史四人鴻臚寺鳴贊
二人分立

御道左右東西面序班二人立貢使之北東面均朝服
鳴贊贊齊班序班引貢使至西丹墀內以次序立
北面東上贊進衆進贊跪叩興行三跪九叩禮畢
主客司官奉頒給國王

賜物前授貢使貢使跪受轉授從人乃以次頒貢使及從官從人

賜物主客吏奉授各跪受訖贊叩興復行三跪九叩禮興引退館卿率貢使及從官從人出

賜燕於禮部如儀

詳見嘉禮

畢皆退

右燕賚

事竣貢使將回國光祿寺備牲酒果蔬禮部侍郎一人詣館舍筵燕如在部儀朝鮮南掌仍以迎接官

伴送出境安南琉球緬甸暹羅

遣司官一人伴送西洋以原迎官二人給郵符沿途
供館舍車舟飲食官軍防護如初來禮至貢道所
經省會

賜燕司道一人主之儀與禮部燕同督撫大吏別遣官
送出境自京伴送官以事竣復

命於

朝

右送往

勅封外國之禮凡朝貢之國世子嗣位權攝國事遣其陪

臣請

命於

朝禮部疏

聞得

旨報可工部製

節內閣撰

勅

印世傳授

均送禮部禮部奏

遣正副封使各一人持

節齋

勅往封朝鮮封使以內大臣禮部滿侍郎內閣滿學士
侍衛充服色儀從各從其品安南琉球以翰林院
侍讀侍講編修檢討六科給事中禮部郎中員外
郎主事內閣中書充

特賜一品麒麟服儀從皆視一品啟行之日工部給龍

旗御仗牌繖兵部給乘傳防護官軍皆候於禮部
大門內禮部儀制司官設案於堂上正中陳

節於左陳

勅於右尚書侍郎二人於案左右立儀制司官二人隨
其後均朝服封使朝服詣部至堂中跪儀制司官
一人奉

節一人奉

勅各授尚書侍郎以授正副使皆恭接以興出儀門外

官軍接奉加節衣負

勅書乘馬行旗仗前導使者易征衣乘傳偕行

右遣使

封使入所封國境其國邊吏供備館傳夫馬所經之地文武官出郊跪接如迎

詔書之儀將及國嗣封國王遣其陪臣出郊迎接

勅書勞使者飾館舍供張於國門之外備龍亭香亭旗仗鼓樂祇候於館列屏於王殿上設案於正中前

設香案均南向設國王受封位於香案南拜位於
受封位之南設衆官拜位於庭內東西皆北面贊
禮二人位國王拜位之北引禮二人位贊禮之南
引班四人位衆官拜位之北皆東西面樂陳於門
內儀仗陳於庭中皆左右分列使者既及國迎接
官迎至館恭設

節

勅於龍亭內馳報國王王率其國陪臣朝服郊迎迎接

官以龍亭行香亭旗仗鼓樂前導使者乘馬從國
王以下咸跪候過輿隨入國門至府龍亭入中門
升階陳於正中使者及階下馬從升執事者脫節
衣奉

節授正使持前行奉

勅授副使隨行入殿使者陳

節

勅於中案皆退立案東宣讀官立於使者之後引禮引

國王就拜位北面引班引衆官均就拜位北面立贊禮贊跪王率陪臣皆跪贊叩興國王以下行三跪九叩禮興國王進至受封位前贊禮贊跪國王跪副使進奉

勅書付宣讀官西面展讀訖以

勅書授國王國王祇受轉授從官跪接以興副使復位國王三叩興退至拜位前贊跪叩興國王以下復行三跪九叩禮興率其陪臣出戟門外正使奉

節詣龍亭執事者加節衣陳於亭昇出使者隨出國王
以下跪送使者以

節詣館國王乃易常服適館勞使者揖讓行禮畢退饗
燕致饗餼如儀及歸率其陪臣跪送

節於國門外如初迎禮使者回

朝以事竣復

命還

節並

賜服於所司

右國王受封

使者既還

朝國王乃修表文具方物遣其陪臣詣

闕謝

恩廩餼燕賚均如常朝貢之儀

右國王表謝

若外夷歸誠初奉

朝命者禮部奏請

命正副使持

節齋

勅印往封儀與前同若荒遠阻絕之區以

勅書授來使齋回儀制司官設案於

午門外甬道上正中陳

勅尚書一人立案左儀制司官隨其後鴻臚寺鳴贊二人立甬道左右均朝服館卿率來使朝服入至西

丹墀內祇踈鳴贊贊授

勅序班引詣案前北面贊跪來使跪儀制司官一人奉
勅授尚書以授來使恭接授從官興退詣丹墀之西聽
贊行三跪九叩禮畢乃恭齋回國以授其國王遣
使詣

闕謝

恩如儀

欽定大清通禮卷四十三

欽定四庫全書薈要卷八千三百七十四

欽定大清通禮卷四十四

賓禮

外藩親王見宗室親王之禮賓及門王府屬官入告主人降階迎賓辭主人升賓從賓入門而右西位東面主人入門而左東位西面各行二跪六叩禮畢即席序坐位如之賓之從官階上二跪六叩興入右門隨坐於賓後執事者進茶賓受茶叩主

人答叩飲茶叙語畢從官趨前楹跪一叩興趨出
賓起離席叩主人答叩皆興賓辭出主人送賓於
階下退府屬官送於府門外賓退屬官乃退若外
藩郡王見主人迎送不降階相見賓二跪六叩主
人答一跪三叩餘跪受賓辭出跪叩主人答跪不
叩餘如親王見儀外藩貝勒見入自中門闕左王
出坐迎貝勒行二跪六叩禮王立受王就位正坐貝
勒侍坐從官行禮隨坐如儀貝勒受茶一叩飲茶

叙語畢從官先出貝勒離席跪叩辭退王出坐府
屬官送於府門外外藩貝子公見府屬官引至殿
外行二跪六叩禮王坐受辭出跪叩王坐受亦如
之餘如貝勒見儀

右宗室外藩親王相見

外藩親王見宗室郡王之禮賓至主人迎於大門
內肅賓入及階讓升主人由東賓由西及門讓入
主人就右西面賓就左東面行二跪六叩禮東西

序坐從官行禮隨坐待茶辭退均如內外親王見
儀主人送賓於大門內府屬官送於府門外各退
若外藩郡王見與內外親王相見儀同外藩貝勒
見與外藩郡王見親王儀同外藩貝子公見與外
藩貝勒見親王儀同

右宗室外藩郡王相見

外藩親王見宗室貝勒之禮賓至主人出迎於府
門外肅賓入賓先行主人少後從行升階亦如之

主人入門而左東面賓入門而右西面各行一跪
三叩禮東西序坐從官行禮隨坐均如儀待恭辭
退賓皆一叩主人答送賓於府門外乃退若外藩
郡王見行禮坐次視親王主賓出入並行迎送及
於大門府屬官送於門外外藩貝勒見行一跪三
叩禮餘與內外郡王相見儀同外藩貝子公見行一
跪三叩禮主人跪受餘與外藩貝勒見郡王儀同
右宗室外藩貝勒相見

外藩親王郡王貝勒見宗室貝子公之禮賓至主人迎於大門外賓自西先行主人自東少後行升階入門亦如之主人位左賓位右東西面各行一跪一叩禮序坐從官行一跪一叩禮隨坐待茶如前儀從官先一叩辭退賓主各一叩興主人送賓於大門外候乘馬乃退若外藩貝子公見行一跪一叩禮餘與外藩貝子公見貝勒儀同

右宗室外藩貝子公相見

京官敵體相見之禮賓及門從者通名閤人入告
主人肅衣冠出迎於大門內揖賓入每門讓於賓
及階讓升及門讓入賓主皆北面再拜興主人爲
賓設坐西面賓禮辭揖主人答揖卒正坐賓爲主
人設坐東面揖如之主人揖賓就坐執事者進茶
賓受茶拜手主人答拜飲茶叙語畢賓告辭揖主
人答揖降階賓辭主人固請乃送賓於大門外視
賓乘輿馬主人乃退尚書左都御史見大學士儀

亦如之一品至八九品官敵體相見儀並同三品以下京堂官翰詹科道見大學士主人迎於儀門內送出大門外不視乘輿馬餘儀同科道見左都御史副都御史各部尚書主人送出大門外退不視乘輿馬餘儀同翰詹科道與閣部院寺監屬官相見均與敵體相見儀同有尊卑名分者均各盡其尊卑之禮

右京官敵體相見

閣部院寺監屬官見其長官之禮初見屬官公服

詣署首領官引至堂上以銜名履歷呈於各長官

坐案屬官以次向坐三揖長官避席答揖退若燕

見至大門外下輿馬蹏於門內閣人通名入見長

官迎於階下詣廳事

廳事以南
向為率

屬官當楣北而三

揖長官東面答揖序坐屬官東位西面

旅見則以
次東西面長

官位於西南東北面命坐揖茶至揖凡屬官揖長

官皆答揖啟事畢三揖如初辭出長官送於二門

外屬官出大門稍遠乘輿馬見大學士儀同

右在京屬官見長官

國學生見國子師之禮初見弟子公服具名柬國
學首領官引至堂上北面三揖師立受辭退北面
三揖出若燕見通名竢於門內師召入迎於階上
弟子升階竢師前行隨入堂當楣北面再拜師西
面答揖師命坐弟子北面揖趨正師坐畢侍坐於
側東位西面

疏見則以次
列坐北上

師位於西南東北面請

問揖茶至揖辭退北面三揖師皆答揖師出送前行弟子從及二門外弟子三揖俟師入乃退翰林院庶吉士見大學士及見教習庶吉士儀同

右國學師弟子相見

直省官敵體相見之禮賓至署從者通名門吏啓門賓肩輿入儀衛止儀門外主人出迎賓至外堂檐下降輿主人揖賓入每門讓於賓及廳事各再拜興主人爲賓設坐西面賓禮辭揖主人答揖賓爲

主人設坐東面揖如之主人揖賓就位坐執事者
進茶主賓各拜手飲茶叙語畢賓避席揖辭退
主人答揖賓出主人送至外堂檐下視乘輿主人
退賓肩輿出如來儀學政鹽政及

欽差官與督撫相見儀同文職督撫司道以下府州縣
佐雜以上武職提鎮以下千把總以上凡敵體官
相見儀並同

右直省官敵體相見

直省文屬見長官之禮司道見督撫初見具銜名
履歷公服詣署至大門外降輿入及儀門由左門
入督撫迎於外堂屏內督撫先行司道隨入及廳
事司道當楣北面稟叅督撫辭乃三揖督撫西面
答揖督撫正坐司道東旁侍坐

旅見則以次東西而

命坐揖茶

至揖凡司道揖督撫均答揖辭出三揖如初督
撫送至屏門外司道三揖趺督撫入門復三揖趨
出至大門外乘輿返若公事謁見常服通銜名三

揖就坐餘如前儀知府見督撫督撫不迎送餘如
司道見儀同知通判見督撫轅門下與馬餘與知
府見同州縣見督撫轅門外下與馬升堂北面再
拜辭退三揖督撫皆立受餘如知府見儀知府同
知通判見司道司迎送於屏門外道迎送於堂檐
下坐次知府等東位西面司道位於西南東北面
餘如見督撫儀州縣見司道司道不出迎見畢辭
出司送於階下道送於屏門外餘如知府見儀

州縣見知府迎送於屏門外餘如見司道儀見同
知通判迎送於堂檐下餘儀同直隸州知州見長
官及接屬官儀與知府同直隸州州同州判見長
官儀與州縣同教職見督撫司道知府等官均如
知縣見儀首領佐雜官見督撫行一跪三叩禮不
坐見司道知府儀同府首領縣佐貳等官見同知
通判如州縣見司道儀雜職官見同知通判行一
跪三叩禮不坐雜職官見知縣如州縣見知府儀

右直省文官見長官

直省武屬見長官之禮副將見提督初見具銜名披執轅門外下馬門吏稟白傳命免披執易公服由左門入升堂北面稟叅辭三揖提督西面答揖坐次提督正坐副將侍坐茶畢辭退三揖如初提督送至階下常見不披執餘儀同見本鎮總兵官迎送於堂後屏外坐次副將東位西面總兵官位西南東北面餘如見提督儀叅將遊擊見提督北

面跪三叩辭退三揖出提督起立答揖不送餘如
副將見儀見總兵官如副將見提督儀見本鎮總
兵官起立不送都司守備見提督暨總兵官披執
北面跪自宣銜名三叩提鎮坐受命坐西面席地
坐不設茶辭出三叩趨退提鎮不起立公事謁見
常服不宣銜名餘儀同千把總見提督暨總兵官
跪啓事不坐餘與都守同叅將遊擊見本協副將
如見總兵官儀辭出副將離位送都司守備見副

將行一跪三叩禮副將不揖不送餘如叅遊見儀
都司守備初見本管叅將遊擊行庭叅禮辭出本
管官離位送常見三揖本管官答揖出揖如初若
非本管官送迎及大堂屏後餘儀同千總以下官
見副將叅將遊擊與見總兵官同千總見都司守
備與守備見叅遊同把總見都司守備跪三叩辭
出都司起立不送餘與千總同

右直省武職見長官

司道見學政具名銜二門外下輿馬由中門入學
政迎於堂檐下揖入行賓主禮若學政爲三品以
上大臣司道謁見與見督撫儀同知府同知通判
見學政行三揖禮餘如見督撫儀州縣見學政與
見督撫儀同凡州縣行禮學政避席答揖教職見
學政與知縣見同凡教職行禮學政立受首領佐
雜官見學政與見督撫儀同司道以下官見鹽政
及

欽差官均與見學政儀同運使鹽道見鹽政與司道見
督撫儀同運同運判等官見鹽政與知府見督撫
儀同科目出身鹽大使見鹽政與知縣見督撫儀
同

右直省官見學政鹽政

順天奉天府屬官相見之禮同品官僚視直省敵
體見儀治中通判見府尹如直省司道見督撫儀
見府丞如司道見學政儀屬下州縣教職見府尹

如見督撫儀見府丞如見司道儀見治中通判如
見府倅儀經歷以下官見府尹丞治中通判如直
省首領官見知府府倅儀奉天府屬知府見府尹
如直省知府見督撫儀見府丞如見學政儀府州
縣見

盛京五部侍郎如見府尹儀

右京府官屬相見

直省文武官相見之禮提督見總督由中門入總督

出迎於大堂檐下揖讓入升堂三揖畢總督正坐提督僉坐若提督兼世職者總督東位西面提督西位東面辭出總督送至堂檐下視乘輿退見巡撫行賓主禮總兵官見總督與司道見儀同見巡撫行賓主禮副將見總督初見披執一跪三叩侍立待茶辭退三揖出見巡撫與知府見儀同叅將以下官見總督行一跪三叩禮千總以下官見司道儀同司道見提督如提督見總督儀見總兵

官行賓主禮知府同知通判見提督總兵官如司
道見提督儀州縣見提督具銜名由左門入提督
迎於階下升堂北面三揖坐次提督正坐州縣侍
坐辭出三揖如初提督送至屏門外見總兵官儀
同八九品以下佐雜官見提督總兵官行一跪三
叩禮

右直省文武官相見

直省滿漢官相見之禮鎮守將軍副都統與督撫

提鎮相見行賓主禮司道以下官見將軍與見總
督儀同見副都統與見總兵官儀同協領叅領見
督撫與司道同佐領防禦見督撫與知府同驍騎
校以下官見督撫與州縣同餘不相統屬者均行
賓主禮

右直省滿漢官相見

儒學弟子員見學師之禮與國子生見國學師
儀同學政蒞任後釋奠學宮講學於彝倫堂教職

引學弟子員謁見均公服北面再拜學政立受歲
科試畢學弟子員列二等者均公服祇謁於學政
堂下學政升堂北面三揖學政立受閱卷畢退三
揖出入泮謁見禮亦如之

右直省學校師弟子相見

士人敵體相見之禮賓及門從者通名主人出迎
於大門外揖入及門及階揖如初登堂主賓均北
面再拜興主人趨正賓坐賓禮辭主人卒正坐左

還賓正主坐亦如之即席賓東位西面主人西位
東面飲茶序語畢賓退揖主人及階及門揖辭主
人均答揖乃送賓於大門外揖如初若見父之執
友與見尊長儀同

右賓友相見

受業弟子見師長之禮初見師未出先入設席正
位竝於堂下師出召見乃奉贊入奠贊於席北面
再拜師起答揖興謹問起居命之坐乃侍坐有問

則起而對辭出三揖師不送常見侍坐請業則起
請益則起師有教立聽命坐乃坐師問更端仍起
而對朝入一揖暮出一揖與同學弟子均以齒序
右受業弟子見師長


卑幼見有服尊親之禮及門從者通名族外次尊
長召入見升階北面再拜尊長西面答揖命坐視
尊長坐次侍坐於側茶至揖叙語畢稟辭三揖凡
揖尊長皆答出尊長不送若尊長來見卑幼迎送

於大門外行禮坐次如前儀

右卑幼見尊長



欽定大清通禮卷四十四



總校官庶吉士

臣

張能照

校對官庶吉士

臣

翟槐

騰錄貢生

臣

王嘉稷